



**ARUBA PRESENTE
NA MINI MODEL
WORLD 2024**



WWW.SOLODIPUEBLO.COM



SOLODIPUEBLO@GMAIL.COM

10 AÑA DI PRISON EXIGI PA DUO CU A EXPORTA MAS CU 100 KILO DI COCAINA DEN CONTAINER

**CONFERENCIA DI TRABOU
DI SEA PA STIMULA
EXITO DEN ESTUDIO DI
STUDIANTENAN CARIBENSE**



**GRUPO DI HOBEN CARA TAPA
Y CU ARMA DI CANDELA,
CUCHIU, PALO Y PIEDRA A BAY
MADIKI MENASA OTRO HOBEN**



**CASTIGO DI 1
AÑA Y 6 LUNA
DI PRISON PA
HOMBER CU
TABATA CORE
AUTO CU AMIGO
CU ARMA DI
CANDELA**

**MOTOCICLISTA HERIDA DEN
ACCIDENTE DI TRAFICO**



MOTOCICLISTA HERIDA DEN ACCIDENTE DI TRAFICO



Frankrijkstraat / Italiëstraat - Diabierna merdia polis mester a bay atende un accidente di trafico, entre auto y scooter.

E accidente mes a sosode ariba e crudada cerca di Ibisa.

Na yegada agentenan a topa cu un Hyundai Getz y un Scooter, mientras e

motociclista mes tawata ariba caminda drumi kehando di dolor.

Mesora algun persona cerca, a sali yuda dunando un poco sombra di e solo cayente y e caminda tambe cu den e oranan ey ta super cayente. Por a mira cu mayoria golpi tawata na pia.

Ambulance tawata

necesario na e sitio. Na yegada e Paramediconan a prepara e motociclista pa hib'e Hospitaal, unda e lo ricibi tratamiento mes avansa.

Manera por mira ariba e imagennan, ta trata di un accidente unda no a duna preferencia. Polis di trafico tambe a presenta pa tuma datos.

DMH CONHUNTAMENTE CU CPA CU UN ANOCHI INFORMATIVO DI SUPERVISION

Dialuna anochi a tuma lugar un encuentro pa tur cabesante di Centro di Cuido di Mucha na John F. Kennedy (JFK). E meta di e anochi aki tabata pa duna informacion relevante tocante e proceso y ehecucion di supervision den centro di cuido di mucha. DMH conhuntamente cu Cuerpo Policial Aruba, esta Polis di Barrio y Scol di Polis, a uni forza y a percura pa brinda informacion amplio riba loke ta e trayecto y implementacion di supervision den Centro di Cuido di Mucha, cu ta stipula pa cuminsa pronto den 2024. Den un sala completamente yen, 41 centro di cuido di mucha, representa pa sea cabesante y/of trahador pedagogico tabatin e oportunidad pa por haci diferente pregunta, a base di e informacion brinda y asina nan tambe por ta na altura di loke por spera durante un supervision di e supervisor di DMH.

Supervision ta sumamente importante pa garantisa un desaroyo completo y sigur di mucha y tambe un bon cuido di mucha, e supervision adecua di e centronan di cuido di mucha ta

esencial. Tanto e doñonan (propietario) di e centro di cuido di mucha y gobierno ta trahando duro pa aumenta e contribucion conhuntamente na e calidad di e centronan di cuido di mucha. E doño (propietario) di e centro di cuido di mucha ta responsabel pa cumpli cu e rekisitonan di calidad, stipula den articulo 9 y 10 di e Ordenanza Nacional di Centro di Cuido di Mucha (Landsverordening Kinderopvang) (AB2017 No. 38), cu ta delinea y salvaguardia cuido di mucha na un manera responsabel. E rekesitonan di calidad ta aparece den e Ministeriele Regeling Handleiding Kwaliteitseisen Kinderopvang, cu ta disponibel riba website di DMH (www.dmh.aw).

E supervision lo tuma lugar den forma di observacion concreto, a base di un checklist di e supervisor, teniendo combersacion y dunando guia y sosten na e doño- y trahadornan. E supervisor tambe por repasa e documentonan necesario, como tambe tene bista riba e diseño (inrichting) y uzo di e tur e areanan, cu e muchanan ta uza den e centro. E supervision aki lo tuma lugar minimo 1



biaha tur aña, sin previo aviso y tambe tin espacio pa tin supervision di continuacion.

CPA, den persona di sra. Suzy Nadal, di Scol di Polis, a amplia mas riba loke ta e parti huridico y tambe e funcionamiento di e autoridadnan di e supervisor. Sra. Nadal a elabora amplio riba e diferencia di delito (misdrijf) y infraccion (overtreding) y alabez a splica tocante ehecucion administrativo (bestuurlijke boete). DMH kier a gradici tur cabesante y/of trahador pedagogico presente, como tambe sra. Nadal y mr. Matos di CPA, Polis di Barrio, pa nan presencia y presentacion.

Minister Endy Croes: E PAISNAN DI REINO HULANDES TA TRAHANDO DEN COLABORACION PA HIBA ENSEÑANSA RIBA UN SIGUIENTE NIVEL E mandatario Hulandes a indica cu Minister Endy Croes ta un gran lider pa enseñansa di Aruba.

Diaranson ultimo, durante Conferencia di Prensa di Gobierno di Aruba, Minister di Enseñansa y Deporte Sr. Endy Croes hunto cu Minister di Enseñansa, Cultura y Ciencia Sr. Robbert Dijkgraaf a informa Pueblo di Aruba tur locual ta haciendo hunto riba tereno di enseñansa. E expertonan di Sint Maarten, Hulanda, Corsou, Boneiro y Aruba a reuni na Aruba dia 9 y 10 di april 2024 pa e proyecto Mision di Conocemento (Kenniscomisie). E meta di “Kennismissie” ta pa traha hunto riba cierto aspecto riba nivel di MBO y enseñansa superior di e paisnan di Reino Hulandes. E temanan cu ta trata durante e reunion aki ta relevante pa tur pais entre otro, conecta e necesidadnan di mercado

laboral (PEL) y intercambio di estudiante (SEA). E echo cu e sistema educativo y diploma di e paisnan di Reino Hulandes ta similar, ta facilita nan trabou den ekipo. Ta trahando pa crea un panorama educativo pa enseñansa superior cu por beneficia e hobennan estudiante di Reino Hulandes.

Durante e conferencia di trabou cu lo tuma luga na Corsou dia 11 y 12 di april, lo reuni cu e studentenan di e islanan Caribense y di Hulanda pa intercambia informacion di nan experiencia. Ta importante pa determina kico ta funciona y kico no y evalua unda mester busca otro solucionnan. Minister Endy Croes a gradici Minister Dijkgraaf pa su gran trabou den ekipo y a indica cu a realisa

resultadonan grandi den poco tempo danki na e compromiso di Minister Dijkgraaf. Ademas di esaki, Minister Endy Croes a menciona algun proyecto cu a realisa caba riba nivel di Vierlandenoverleg entre otro, BSN nummer: 1. Awo e studentenan por haci un peticion pa BSN nummer desde nan pais, pa asina facilita e proceso di registracion momento nan yega Hulanda; 2. “Mobiliteitsfonds”, unda a inverti alrededor di 1.2 miyon di euro pa e periodo 2024-2006; 3. “Stimuleringsfonds”, unda a inverti 1 miyon di euro pa e periodo 2024-2028. Ademas di esaki, ta trahando riba e recomendacionnan di Doorlichting van het Arubaanse Onderwijsbestel entre



otro, registracion di data, maneho di idioma, structura di cuido, infraestructura di edificio y modernisacion di e leynan di enseñansa.

Pues ta trahando duro riba tereno di enseñansa. Minister Dijkgraaf a felicita Minister Endy Croes pa e gran trabou cu e ta haciendo pa e desaroyo di enseñansa en general. E mandatario Hulandes a indica cu Minister Endy Croes ta un gran defensor

y pionero di enseñansa. Fuera di esaki, Minister Dijkgraaf a indica cu e “kennismissie” aki por hiba e colaboracion di e paisnan di Reino Hulandes riba un siguiente nivel. Finalmente, Minister Dijkgraaf a expresa cu nan ta orguyoso di tur loke e paisnan di Reino Hulandes a logra trahando hunto y a gradici Minister Endy Croes pa e gran trabou den ekipo riba e tereno di enseñansa.

HABITANTENAN DI JABURIBARI TIN PROBLEMA SERIO CU ASUNTO DI CACHO RIBA CAYA.



Diaranson anochi si un bisiña cu no ta mara habitantenan di Jaburibari a fada di e cachonan di

e habitantenan ta rabia ya cu e cachonan rian caya ta bolter barinan, subi riba dak di auto ranca y destrosa bumpnan di auto y a laga hopi sushi atras. E habitantenan a yega asina leu te hasta di roga e doño pa sea mara su cachonan, hisa su cura pa asina e cachonan no sali.

Polis a bay papia cu e doño y esaki a declara cu ela bay pa entrega su cachonan pero nan a nenga di acepta nan.





Noticia di Corte

CASTIGO DI 1 AÑA Y 6 LUNA DI PRISON PA HOMBER CU TABATA CORE AUTO CU AMIGO CU ARMA DI CANDELA

Awe mainta Hues di Corte di Husticia a dicta sentencia den e caso penal cu Ministerio Publico a cuminsa contra e homber A.F., kende ta wordo sospecha di ta complice di posecion di arma di candela.

SOLO DI PUEBLO por a compronde cu Fiscal a existi 24 luna di prison pa A.F. pasobra el a yega di haya castigo pa un caso serio caminda arma di candela tabata involvi. Hues a haya A.F. culpabel y a conden'e na 1 aña y 6 luna di prison.

COMPLICE DI POSECON ARMA DI CANDELA

Algun siman pasa, tratamiento di e caso a tuma lugar caminda tabatin 3 sospechoso di arma di candela: S.M., J.M. y A.F. Fiscal a bisa Hues cu asistencia di Polis a wordo pidi na pomp di gasoline den caya grandi na Playa pa hendenan cu tabata haci fastioso. Polis a bay y tabata vigila riba un distancia. Na dado momento e agentenan a mira S.M. purba sconde algo den e auto. Polis a para e auto y a mira S.M. a bolbe purba sconde algo. A haci investigacion den e auto y a haya droga y arma di candela 9 mm. Fiscal a bisa cu S.M. tabata nenga cu e arma ta

di dje y a culpa J.M. y A.F. Fiscal a muestra cu S.M. a bisa Polis cu e sa warda e arma pa A.F. Despues S.M. ta bisa cu e arma ta di un persona cu ta peligroso. Dilanti Hues Comisario, el a bisa cu e arma ta di dje. S.M. a admiti cu e droganan ta di dje. Fiscal ta haya legalmente proba cu S.M. tabatin droga y arma. Fiscal ta haya cu no por bisa cu J.M. tabata sa di e arma y no por prueba esaki. Esey ta trece cun'e cu el a pidi Hues pa declara J.M. liber di posecion di arma.

Pa loko ta A.F., Fiscal a bisa cu A.F. a keda para riba cu e no sa di arma. Sinembargo Fiscal ta haya cu A.F. tabata sa di e arma. E arma a wordo haya den e auto di A.F. Fiscal a bisa cu S.M. mes a declara cu el a warda e arma diferente biaha pa A.F. S.M. a bisa cu e ta soldad di A.F. Fiscal a laga pasa den Corte, video cu a haya den celular di S.M. caminda na Augustus y September 2023, por mira S.M. cu e arma den auto di A.F. S.M. tabata sinta patras ta filma cu e arma. Fiscal a bisa Hues cu A.F. tabata sa cu S.M. tabata arma. Tambe Fiscal a bisa cu a haya combersacion di whatsapp caminda A.F. ta pidi pa bala. Fiscal ta haya cu A.F. y S.M. ta culpable di posecion di arma. Ta asina cu e mesun dia

S.M. a wordo condena na castigo di prison pa e arma y droga. Fiscal a existi 24 luna di prison pa A.F. y a existi pa A.F., cu no tabata deteni, wordo deteni di biaha den Corte y hiba KIA. Hues a bisa cu e ta bay studia e caso y no a tuma decision riba detencion di A.F.

SENTENCIA

Awe mainta Hues a bisa cu e ta haya A.F. culpable di posecion di arma. Hues ta haya cu A.F. tabata hunto cu S.M. entre 13 Augustus 2023 y September 2023 den auto di A.F. cu e arma. Hues a bisa cu ariba e video por mira cu A.F. tabata stuur auto mientras cu S.M. tabata sinta patras den e auto ta filma cu e arma. Hues a bisa cu S.M. a declara na Polis cu e ta un soldad di A.F. y ta cana cu arma. Hues ta haya A.F. ta complice di posecion di arma. Hues a muestra riba e peliger di arma di candela.

Pa cu e castigo, Hues a tene cuenta cu A.F. ya a wordo condena pa un caso di arma y a haci e delito aki durante su tempo di prueba. Hues a condena A.F. na 18 luna di prison y a duna orden di su detencion di biaha. Awor A.F. mester sinta e 18 luna y ta pendiente pa e otro caso cu el a wordo deteni reien.

GRUPO DI HOBEN CARA TAPA Y CU ARMA DI CANDELA, CUCHIU, PALO Y PIEDRA A BAY MADIKI MENASA OTRO HOBEN



Diahuebs atardi a drenta a presenta na Madiki y informe di cu un grupo di menasa un otro hoben, hoben cara tapa y arma mesora a dirigi varios

patruxa na e sitio. Na yegada di e patruxa a bin compronde cu aki lo ta trata di e gang di Haïtianonan di eybanda mes. Nan lo a presenta y a baha cu arma di candela, cuchiu y palo y a menasa e hoben despues nan a bay den un Nissan March shinishi pero e number si e no a logra mira. Polis a tuma su declaracion y a consehe pa bay recherche pa entrega keho di menasa. Mientras e patruxanan a bay rondia den e area.

POLIS A DETENE HOMBER CU A MALTRATA SU PAREHA NA SERO PATRISHI



Diahuebs mainta a drenta informe di un caso di problema di pareha escalando na Sero Patrishi, mesora a dirigi un patruxa na e sitio. Na yegada di e patruxa a bin compronde cu aki ta trata di un caso unda e homber ta agredi su pareha. Polis a tuma nota y mesora a detene e homber mientras a bisa e dama pa e bay recherche pa entrega keho di agresion.

MINISTER ENDY CROES A SALI PA UN BIAHE DI TRABOU NA CURAÇAO, UNDA LO ATENDE WEGANAN INTERINSULAR Y ENTREGA DI E PROME BSN NUMMER NA E PROME STUDIANTE DI CARIBE

Diabierna den oranan tempran di mainta, Minister Endy Croes a sali di biahe pa Curaçao riba dos diferente invitacion. Primeramente, e mandatario di Enseñansa y Deporte lo acudi na Universidad di Curaçao pa e ceremonia oficial di entrega di e prome BSN nummer na e prome estudiante di Caribe. Manera ta conoci, Minister di Enseñansa di Hulanda Robbert Dijkgraaf tabata

na Aruba dia 9 y 10 di april 2024 pa e proyecto Mision di Conocemento (Kenniscomisie).

E conferencia a continua na Curaçao diana 11 y 12 di april, unda cu un delegacion grandi di Aruba, Curaçao, Sint Maarten, y Hulanda ta atendiendo diferente reunion pa traha hunto riba cierto aspecto riba nivel di MBO y enseñansa superior. Ademá di

esaki, Minister Endy Croes ta atende Weganan Interinsular, unda cu e hobennan di Aruba, Boneiro y Curaçao ta competiendo den e disciplina di atletismo, basketball y volleyball. E ceremonia di Weganan Interinsular ta inicia diabierna mainta y ta clausura diasabra anochi.

“Pues, dos dia di trabou basta pisa cu un agenda basta carga di trabou, pero



cu placer nos lo representa Aruba, Minister Endy Croes lo amplia riba e e dignamente”, Croes lo amplia riba e e Minister Endy Croes a biahe di trabou aki. expresa. Di regreso na

CONFERENCIA DI TRABOU DI SEA PA STIMULA EXITO DEN ESTUDIO DI STUDIAntenan CARIBENSE



E di dos conferencia di trabou di SEA a tuma lugar awe y ayera na Corsou, caminda tur isla di Caribe y Hulanda a participa. SEA,

of Aliansa Educacional Strategico, tin como meta primario stimula exito den estudio y chens igual pa studiantenan Caribense.



Ademá, a presta atencion tambe na e prioridadnan di e proyecto SEA.

Durante e conferencia, a tene varios panel y sesion di trabou cu meta pa stimula exito academico di studiantenan Caribense. E enfoke tabata riba un mehoracion di trancion di scol secundario pa MBO/SBO y actividadnan di SEA. Tambe a para keto na e tres puntonan di atencion di SEA, manera

facilitacion di movilidad pa estudiante den Reino, un programa preparatorio pa estudiante cu ta desea di cuminsa cu un educacion universitario, y investigando un mihor coneccion entre educacion y e mercado laboral.

Tanto scolnan secundario como scolnan di mbo/sbo di Caribe a participa, banda di algun scol Hulandes. Ademá, studiantenan for di henter Reino a

participa activamente den e conferencia di trabou y tabatin contribucion valioso na e discusionnan y actividadnan.

E conferencia di trabou di SEA tin como meta pa crea un plataforma pa comparti conocimiento, experiencia y ‘best practices’. E meta final ta pa fortifica educacion y aumenta oportunidadnan pa tur estudiante Caribense.



Noticia di Corte

10 AÑA DI PRISON EXIGI PA DUO CU A EXPORTA MAS CU 100 KILO DI COCAINA DEN CONTAINER

Awe mainta e homber Venezolano E.F.(63) biba na Aruba y e Dominicano J.C. (52) biba na Aruba, a presenta dilanti Hues di Corte di Husticia pa e caso penal cu Ministerio Publico a cuminsa contra nan. Ambos ta wordo sospecha di ta complice di exportacion di en total 103 kilo di cocaine scondi den un container.

SOLO DI PUEBLO por a compronde cu tanto E.F. como J.C. ta bisa cu nan no sa nada di droga. Fiscal ta haya nan culpabel y a exige 10 aña di prison pa cada un.

71 KILO DI COCAINA DEN PIEZANAN

Hues a cuminsa cu E.F., kende ta wordo sospecha di dos exportacion. E.F. a desmenti di ta involvi den esaki. Hues a mostra cu na Polis, E.F. a admiti di ta involvi. Den Corte E.F. a bisa Hues cu e no ta involvi den e trafication di droga. Hues a puntra con e piezanan a yega Fast Delivery. E.F. a bisa cu e doño di e piesanan a yam'e y bisa cu e piezanan ta cla pa hiba Fast Delivery. E.F. a bisa cu el a hiba e piezanan y a registra nan na Fast Delivery. Hues a remarca cu esey ta mostra cu E.F. ta involvi. Segun E.F. e no tabata sa kico tin den e piezanan cu mester a wordo drecha. Hues a bisa cu E.F. a bisa Polis cu hunto cu J.C., nan a sconde e 71 kilo di cocaina

den e piezanan y anterior a yega di haci'e caba. E.F. a bisa Hues cu ningun momento el a duna un declaracion asina na Polis. Hues a mostra cu na Hues Comisario E.F. a confirma cu loke el a declara na Polis ta e berdad.

PISTOOL PONI NA CABEZ

Hues a mostra cu E.F. a declara na Polis cu e tin un tempo caba den e mundo di droga y hunto cu un tal Yecid Marin Torres a trafica droga, door di sconde cocaina den airconan cu a bay Hulanda. E.F. a bisa Hues cu e no a declara asina. El a bisa cu e conoce e persona mas o menos 25 aña. Hues a bisa cu e no ta kere cu ta Polis a inventa e declaracion. E.F. a bisa Hues cu e no ta corda. Hues a puntra E.F. si el a wordo menaza. El a bisa cu no. Hues a bisa cu E.F. a declara cu un persona cu ta traha cu un tal M. a rabia y a menaza E.F. cu un pistol na su cabez. Esey a pone cu E.F. mester a viaha pa Hulanda pa mira si e cargamento a yega. Hues a bisa cu den e mundo di droga, e por imagina cu esnan den droga ta menaza esnan cu ta duna declaracion.

32 KILO DI COCAINA DEN CAHANAN

Hues a puntra riba e di dos exportacion caminda tabatin 32 kilo di cocaina scondi den

cahanan. Segun E.F., el a wordo yama cu e cargamento ta cla pa hiba. E.F. a hiba e pallet di cargamento pa Fast Delivery y a duna e documentonan di carga. Hues a puntra E.F. si el a haya pago. E.F. a bisa cu no. El a bisa cu el a haya 4500 florin for di M. pa paga Fast Delivey. Hues a bisa cu na Polis E.F. a declara cu J.C. a haya 2500, el a haya 1500 florin. El a bisa cu J.C. tambe tabata involvi.

UN SOSPECHOSO TA NENGA

Hues a puntra J.C. si e ta involvi den e dos traficionnan di droga. J.C. a bisa cu e no tin nada di haci cu e casonan aki. Segun J.C., E.F. ta gañando. El a bisa Hues cu e no sa nada di piezanan. Segun J.C., e no tabata na Aruba ora esey a sosode. Hues a bisa cu tin un testigo R. kende a bisa cu J.C. tabata presente. J.C. a nenga y a bisa cu R. ta gaña. El a bisa cu e no tin nada di haci cu droga. Pa loke ta e otro caso di cahanan riba pallet, el a bisa cu el a haci un favor pa hiba algun cahanan di mudamento. E pallet di cahanan tabata riba tereno di J.C. na Seroe Janchi. Segun J.G., si e tabata sa cu tin droga den nan, e lo no a haci favor.

FISCAL

Continuacion pag 8

Minister Dangui Oduber MINISTER DANGUI ODUBER TA INVITA E COMUNIDAD DI PARIBA PA BIN NA E APERTURA DI HEALTHY LIFESTYLE CENTER CU TA HABRI SU PORTA DIASABRA NA MFA SAVANETA

Minister Dangui Oduber ta invita e comunidad di pariba di brug pa pasa na e apertura di Healthy Lifestyle Center (HLC) na MFA Savaneta, diasabra 13 di April entre 5 PM – 7 PM. Healthy Lifestyle Center den MFA lo ta habri pa asina por bishita

y conoce espacionan di e oficina y servicionan cu tin disponibel.

HLC su oficinanan lo ta habri pa inscribi y pa brinda guia profesional pa cu nutricion y movecion, especialmente esnan na riesgopahaya complicacion

di salud, door di hiba un bida no saludabel. E meta ta pa guia e participante pa adapta su bida pa uno mas saludabel cu ta completamente gratis.

Hunto nos lo bai logra tin un comunidad mas saludabel.

MINISTER MADURO TA FELICITA LISETTE TROMP CU SU 45 ANIVERSARIO Y LIENETTE DANIA CU SU 25 AÑA COMO EMPLEADO PUBLICO DI PAIS ARUBA NA DIMP



Diaranson mainta Minister Maduro tabata tin e placer di ricibi Lissette I. Tromp pa asina por felicite pa su 45 aniversario y Lienette H. Dania cu su 25 aniversario como empleado publico di Pais Aruba. Den presencia di Directora, sra. Luenne Gomez-Pieters, Inspector di Belasting, sra. Monica Brinkenberg y famia, e mandatario a entrega cada uno Lissette y Lienette, nan decreto gubernamental y un bunita recuerdo pa e logro grandi aki.

Minister Maduro a gradici tanto sra. Lissette y Sra. Lienette pa tur e añanan di servicio loyal na Gobierno di Aruba. Ademas a felicita y yama danki tambe na nan coleganan y nan famia, cu ta duna nan e sosten, apoyo y cariño pa asina ambos por dedica nan trabou na bienestar di Pais Aruba.



Directora di DIMP sra. Gomez-Pieters y tambe Inspector di Belasting sra. Brinkenberg, kende ta chef directo di e hubilarionan a elabora riba e trabaonan di e hubilarionan. Ambos empleado na nan turno a gradici Minister y nan coleganan y a comparti un

poco di nan experiencia y trabou na Departamento di Impuesto.

Masha pabien y cu nos bon Dios por sigui brinda Lissette Tromp y Lienette Dania hopi bon salud pa asina nan por keda brinda servicio na nos comunidad.

CHAUFFEUR DI BOXTRUCK A BAY DAL TRAS DI UN HYUNDAI CRETA HERIDANDO SU CHAUFFEUR



Diahuebs merdia a drenta na Caya G.F. "Betico" informe di un accidente Croes, mesora a dirigi

un patruya na e sitio. Na yegada di e patruya a bin compronde cu ai ta trata di un accidente unda e chauffeur di un boxtruck no a regula su velocidad ni a mantene distancia a bay dal tras di un Hyundai Creta. Na prome instante a bisa cu no tin persona herida pero despues di un rato e chauffeur di e Creta a cuminsa keha di dolor y a pidi pa ambulans bin control'e.



10 AÑA DI PRISON EXIGI PA DUO CU A EXPORTA MAS CU 100 KILO DI COCAINA DEN CONTAINER

Continuacion di pag 6

Fiscal a bisa Hues cu dia 20 September 2023, Douane a controla container na Fast Delivery. Den piezanan di dos Caterpillar, a haya 71 kilo di cocaina scondi. E compania ta di E.F. E piezanan tabata riba e tereno na Seroe Janchi caminda J.C. ta biba. Segun Fiscal, un testigo a mira cu J.C. y E.F. tabata traha riba e piezanan. Ta asina cu E.F. a viaha pa Hulanda na momento cu e cargamento lo a yega. E.F. lo a bisa cu e 71 kilo ta di J.C. y na Seroe Janchi J.C. tabata prepara e piezanan. Fiscal ta haya cu E.F. a duna declaracion detaya. J.C. a bisa cu e no sa nada. Ta asina cu J.C. tambe a viaha cu E.F. pa Hulanda. Fiscal a sigui cu dia 23 September 2023 Douane a bolbe controla container na Fast Delivery caminda tabatin cahanan di mudamento. A haya 32.5 kilo di cocaina. A resulta cu ta E.F. ta esun cu a manda esakinan. Segun E.F., el a haci un tal Mati un favor pa hiba e cahanan cu tabata na Seroe Janchi. Dos Curasoleño tabata na J.C. Fiscal a bisa cu aunke

cu J.C. ta bisa cu e no sa di droga, un testigo a bisa cu E.F. y J.C. tabata ocupa cu e cahanan y otro hendenan tambe tabata presente. Na opinion di Fiscal, aki ta trata di mas cu 100 kilo di cocaina cu J.C. y E.F. ta complice. El a muestra cu J.C. tin un condena di a forma parti di un organizacion criminal di droga. Fiscal a bisa cu e autonan y e placanan confisca lo por wordo debilbe.

Fiscal a exige 10 aña di prison pa E.F. y J.C.

ABOGADO

Mr. Canwood di E.F., a bisa Hues cu promer E.F. a admiti dos biaha pero despues a nenga. Na opinion di e abogado, esaki por sosode pasobra cu e traduccion di idioma ta trece duda. E ta haya cu no por bay tras di declaracion di e testigonan. Mr. Canwood a bisa Hues cu el a keda sorprendi cu e castigo exige pa Fiscal. El a remarca cu tabatin caso di 8 aña di prison pa 1 mil kilo. El a pidi Hues pa duna castigo husto. Mr. Illes di J.C. a bisa cu ta E.F. a declara contra J.C. y J.C. ta para riba cu e no sa nada di droga.

E abogado ta haya cu e declaracion di E.F. no ta suficiente pa condena J.C. Un testigo no ta wordo considera como prueba. El a bisa cu a laga scucha e testigo A. atrobe y a resulta cu ta a base di potretnan ta saca conclusionnan cu no ta e berdad. Segun mr. Illes, e testigo A. a bisa cu J.C. tabata traha riba un transmission y e piezanan tabata otro caminda. E testigo a bisa cu A. a declara cu e no a bisa cu el a mira E.F. y J.C. ta traha riba e piezanan. E abogado a muestra cu e otro testigo R. tambe a gaña y despues durante interrogacion a sali na cla cu ta un tal Mario a acerca R. pa busca e piezanan. Mr. Illes a bisa Hues cu J.C. no tabata na Aruba pa a traha riba e piezanan. El a conclui cu no tin prueba di complicidad. J.C. a viaha pa Hulanda pa bay mira su yiunan y no pa mira si e container yega. E abogado a bisa Hues cu e ta haya cu mester declara J.C. liber. Hues a sera tratamiento di e caso y a bisa cu dia 3 Mei 2023 lo tin sentencia.

Minister Endy Croes:

A SALI RUMBO PA NOS HERMANA ISLA DI CURAÇAO PA ATENDE E APERTURA Y CLAUSURA DI WEGANAN INTERINSULAR 2024

**Despues di 7 aña Weganan Interinsular ta bek y ta di aplaudi tur e trabounan
haci pa nos muchanan y deporte**

Recientemente, delegacion di Aruba a biaha pa nos hermana isla Curaçao pa competi den Weganan Interinsular 2024 cu ta tuma luga di 11 pa 14 di april. Manera ta conoci, na aña 2022, Minister Endy Croes hunto cu Minister di Enseñansa, Ciencia, Cultura y Deporte di Curaçao Sr. Sithree van Heydoorn y diputado di Infraestructura y Deporte di Boneiro e tempo ey Sr. James Kroon a firma un acuerdo pa reinicia Weganan Interinsular despues di shete (7) aña entre Aruba, Boneiro y

Curaçao. Na aña 2023 Weganan Interinsular a inicia cu 6 disciplina y na aña 2024 Weganan Interinsular a aumenta pa 9 disciplina.

Weganan Interinsular ta inicia na Aruba dia 1 pa 3 di maart den e disciplina di trefbal, dam y ahedres. Despues di esaki, Weganan Interinsular a continua na Boneiro di 14 pa 17 di maart, unda cu e mucha- y hobennan a participa den e disciplina di basketball, aquatlon y futbol. Diahuebs mainta, un delegacion di 37 persona a sali pa e



competencia di Weganan Interinsular na Curaçao: 12 atleta di atletismo, 4 atleta di basketball, 10 atleta di volleyball y un total di 11 delegado y/of coach. Pues, e fin di siman aki, e hobennan ta competiendo den e disciplina di basketball,

atletismo y volleyball. Minister Endy Croes a biaha diabierna mainta pa presencia e clausura di Weganan Interinsular 2024.

Minister Endy Croes ta gradici IBISA, FDDK y INDEBON pa nan tremendo

colaboracion pa realisa e gran evento deportivo aki. Por ultimo, mandatario di Deporte ta desea tur scol cu ta participa den e competencia escolar aki hopi exito. Cu deseo, dedicacion, determinacion y disciplina ta logra.

Prome Minister Evelyn Wever-Croes:

Riba e topico con pa yega na un biblioteca digital na Papiamento,

PROME MINISTER HUNTO CU COLEGANAN MINISTER A REUNI CU FUNDADOR DI INTERNET ARCHIVE SEÑOR BREWSTER KAHLE



Prome Minister hunto cu Minister Xiomara Maduro y Minister Endy Croes, dialuna ultimo a reuni cu fundador di Internet Archive señor Brewster Kahle y un colaborador señor Chris Freeland, y hunto cu Director di Archivo Nacional señor Raymond Hernandez y Directora di Biblioteca

Nacional señora Astrid Britten.

Un topico hopi importante cu a delibera riba dje tawata riba digitalisacion y con pa yega na biblioteca digital na Papiamento cu e meta pa nos conserva nos idioma y haci'e accesible pa mas hende.



Señor Kahle ta un figura pionero den preservacion y acceso digital. Señor Kahle ta un bibliotecario digital y fundador y director di Internet Archive. Internet Archive, estableci na 1996 ta un biblioteca digital gratis cu ta archiva documentonan di World Wide Web y ta haci nan universalmente aceptabel y accecibel pa tur hende y na tur parti di mundo.

Bou di su liderazgo, Internet Archive a bira

un di e bibliotecanan digital mas grandi y mas significante globalmente, incorporando un variedad amplio di material manera buki, website, musica, video, y hopi mas. Dedicacion di Kahle pa preservacion di herencia digital y promocion di acceso universal na informacion, a gana reconocimiento y aplauso amplio den e terenonan di tecnologia, biblioteca y hopi mas. Señor Kahle tambe ta co-fundador di

Alexa.

Prome Minister ta gradici coleganan cu a atende e reunion interesante aki, Director di Archivo Nacional, Directora di Biblioteca Nacional y tambe señor Kahle y señor Freeland kendenan a trece informacionnan hopi importante y interesante dilanti. Lo sigui cu e combersacionnan con pa introduci e tecnologia aki y yega na un biblioteca digital na Papiamento.

ACCIDENTE PA FALTA DI PREFERENCIA NA TANKI LEENDERT

Diahuebs merdia a drenta informe di un accidente na Tanki Leendert, mesora a dirigi un patruya na e sitio. Na yegada di e patruya a bin compronde cu aki ta trata di un accidente unda cu un Nissan March no a duna un Kia Cerato preferencia y nan a dal den otro.

Afortunadamente ningun hende a resulta herida.




CHAUFFEUR DI AUTOBUS NO A REGULA SU VELOCIDAD NI MANTENE DISTANCIA A BAY DAL TRAS DI NISSAN MARCH

Diahuebs ainta a drenta informe di un accidente na Hendrikstraat, mesora a dirigi un patruya na e sitio.

Na yegada di e patruya a bin compronde cu aki ta trata di un accidente unda cu e chauffeur di e autobus no a regula su velocidad

ni a mantene distancia a bay dal tras di e Nissan March su dilanti. Afortunadamente ningun hende a resulta herida.



Candidato di AVP, Clifford Heyliger:

Pronto lo bolter cos pa nos por bolbe sinti pas y goso den curason, mente y cartera



Durante e presentacion di Partido di Pueblo Arubano AVP su 10 punto pa trece prosperidad bek, candidato Clifford Heyliger a amplia riba esun prome, esta

pa trece un alivio rapido, controla e costo di bida y formalisa, den cooperacion cu Hulanda, un institucion cu ta monitor e realidad socio economico

di nos pais.

Heyliger ta kere cu door di ignora e situacion actual, Gabinete Wever-Croes kier haci como cu e deficit den poder di compra no ta existi. Mientrastanto e ciudadano tin cu wak bon ora di haci compras paso ya e no por cumpra loke e ta desea, pero loke placa ta yega p'e. Mayoria mata y tata di famia tin mester di dos trabou y asina mes sa cu salario no lo yega pa henter e luna. Hera welo y rumannan tambe mester traha pa yuda.

Pero mientras Partido AVP ta plania pa mehora, parlamentario Tromp-Yarzagaray ta parece di no ni sikiera ta compronde kico e bestaansminimum ta representa, Heyliger a comenta. Esta cu esaki ta e punto di salida pa midi e grado di pobresa den bo poblacion. Pasobra si bo salario minimo y bo pension no ta yega pa cubri e minimo pa biba, bo ta simplemente creando pobresa den bo pueblo.


E situacion aki ta keda crea un buraco mas grandi y mas dificil pa sali for di dje, segun e candidato di AVP. Heyliger: "Tin un diferencia entre smart shopping y forceful shopping. Nan ta forsa bo di cumpra cos aunke no ta esun mas saludabel of

miho, pasobra e placa no ta yega."

AVP kier pa e famia Arubiano no mester haya stress pa placa, pa con ta bay paga pa cuminda, pa gasolin, pa schoolgeld, pa remedi, ni tampoco con pa diberti maske ta un bes pa luna den famia. Tanto bal e gobierno actual ta gaba cu surplus aki aya y pueblo ta pasa hamber. AVP no ta djis wak cifra y buki, AVP ta wak e 100 mil y pico hende y ta pa e ser

humano ta traha un desarojo economico.

Unda tin vision y tin curason pa hende, un pais ta progresa. Esaki ta loke bo tin den e partido AVP. "Pueblo cos ta duro y ainda falta un tiki pa bay, pero nos ta bay bolter cos. E ora ey di berdad ta bay sinti den curason, mente y cartera e pas y goso cu mirada pa futuro. E tempo ta yegando." Asina candidato Clifford Heyliger a finalisa bisando.



Obituario

Publica serka nos anuncio di fayecimento di bo ser keri.
Nos tin 2 pakete pa ofrece;

Pakete 1: Anuncio di fayecimento te dia cu e defunto
ser dera

Gradicimento y invitashon pa misa pa 3 dia Afl 250,00

Pakete 2: Anuncio di fayecimento te dia cu e defunto
ser dera

Gradicimento y invitashon pa misa pa 3 dia

Na Canal 22 1x prome cu Noticiero 22 Afl 400,00

Pa mas informashon por tuma contacto cu oficina na
585-9500 of na 741-4554

HOTEL BANDA DI AIRPORT TIN DOBEL BENTANA PA DEMPEL E SONIDO DI AVIONNAN PERO NO E BOROTO DI WELDERMENTO

Diaranson anochi a drenta informe di un sonido irritante cu ta stroba turistanan di e hotel banda di airport pa drumi, mesora a dirigi un patruya na e sitio. Na yegada di e patruya

a bin compronde cu aki ta trata di un boroto cu ta bini for di un bisiña cu ta welder den oranan laat di anochi.

Polis a papia cu e bisiña y esaki a coopera pa asina

para e trabao den anochi. Mester menciona cu e hotel a ser traha cu dobel bentana pa asina dempel e sonido di e avionnan pero aparentemente otro sonidonan no!



Aruba presente na Mini Model World 2024



For di 8 te cu 15 di april proximo, Cas Princesa Aruba tin dos candidata presente na Republica Dominicana compitiendo den e di 8 edicion di e certamen Model World.

E dos reinanan ta Xamarah Anthonij (10) y Samantha Romero (12). Hunto cu reinanan di paisnan manera Panama, Puerto Rico, Peru, Republica Dominicana, Mexico y mas.



Xamarah lo ta den e competencia di Mini Model World - y Samantha den Pre Teen World 2024. Den e prome edicion Sendy Loefstop gana Pre-teen mini model world. Esey tawata na 2016.

Cas Princesa Aruba, famia y tur amigo ta manda palabra di exito na tur dos reina y cu nan logra e corona pa Aruba.

Aruba por vota pa e reinanan via e website di Mini Model World. Potret pa cortesia di Mini Model World y Cas Princesa Aruba

MARAVILLAS DE LA FE

Salud - Suerte - Amor

Aruba: 748-5671

Cartas di tarot

Bo ta sufrí di un malestar cu bo no por cura?
 Bo ta victima di bruheria?
 Bo plaka no ya jega?
 Bo cumpra numbertan y bo no ta gana?
 Bo ta bai casino y no puede tur bo plaka?
 Bo tin problemanan di amor?
 Bo pareja ta gañabo?
 Fracaso. Soledad. Malesanan angustia. Mala suerte
 Comunica na 748 5671

HOOI FRESCO

A YEGA PA ALF 39,- SO!!!

TEL: 5941317

ADDRESS: THE GOLD MINE

RANCH (MATIVIDIRI 60)

DRS. MERVIN WYATT-RAS:GOBIERNO MESTER STOP DI MAKE-UP Y ATENDE BERDADERAMENTE CU POBRESA Y ABUSO DI MENOR



Parlamentario drs. Mervin-Wyatt-Ras a tuma nota cu Evelyn Wever-Croes na maart a declara luna di April como luna contra di abuso di menor. E atencion lo ta dirigi riba concientisacion. Aki Evelyn Wever Croes ta hala e minister encarga cu Asuntonan Social, Rocco Tjon, un banda pa e bai atende cu criticanan di comunidad. Nos comunidad ta cansa di sigui warda riba un afspraak y yudansa ora ta trata abuso di menor y tambe pa otro problemanan di salud mental di mucha. Evelyn Wever Croes a core campanja cu e lo pasa un ley di 6 minuut. El a priminti pueblo cu e lo introduci castigo minimo. E no a cumpli y awor e ta admiti cu apesar di cambio di ley y guia, casonan ta sigui crece y ta mihor pa atende cu concientisacion. Aki a desenmascara Evelyn su enganjo. Na anja 2017 ora cu Evelyn Wever-Croes a drenta gobierno e y su colega Glenbert Croes a busca argumento pa declara un crisis social na Aruba. E argumento tabata cu tin aumento di casonan di abuso di mucha, locual awe e ta admiti cu ainda tin dicho aumento. Kiermeen 38 miyon florin inverti pa e

yega na mesun argumento cu promer cu 2017 cu ainda tin aumento di casonan di abuso di menor. A usa 2 mucha cu a perde nan bida e tempo ey dor di nan mayornan, pa por trese un sociaal crisisplan, y lanta un fondo di 38 miyon florin cu na varios ocasion CAft a bati riba dede di e minister Glenbert Croes cu e fondo tabata ilegal. E meta principal di crisisplan tabata pa baha wachtljsten, pa registra y haci ayudo mas accesibel y efectivo. Locual no a logra, paso te ainda clientenan hoben tin cu warda largo pa haya yudansa y ta wordo manda di cashi pa muraya sin haya e yudansa desea. Gobierno, sin presupuesta, a coloca contractantenan pa atende cu cliente, cual contractanten a bai cas despues cu nan contract a finalisa. A hiba par di combersacion cu clientenan y manera ta di spera si e cliente sinti cu e no ta ser yuda e no ta show up mas. Pues asina hopi liher a bisa cu a elimina e zogenaamde wachtljst largo. Diferente instancia den reunion cu Staten a indica cu nan no ta kere den contractanten, sino cu trahadornan mester ser incorpora den begroting di e instancia mes y no den

un fondo cu ta ser maneha dor di un minister. Varios di e fundacionan tampoco a haya yudansa financiero suficiente, manera primintido dor di gobierno. Ademas diferente di e proyectonan cu a ser inicia no por a continua dor di falta di vision y maneho duradero di e gobierno aki, manera esun pa esnan cu limitacion, pa mamanan hoben y centro pa hoben. Pues a traha ad-hoc djies pa campanja y gana eleccion paso despues cu gobierno a cambia y ministers a cambia, no a entrega Parlamento ni evaluacion di Crisisplan. A surgi e idea pa un Family Justice Center(FJC). Den promer instante a crea e impresion cu e center aki lo tin un cartacter social. Sin embargo e ta completamente dirigi riba e proceso/procedurnan judicial ora di duna keho pa yega na prueba. Tin ya caba varios presupuesto desde anja 2021 cu a ser trata y te ainda e centro aki no a bira realidad. No ta conoci tampoco con e FJC lo traha den cooperacion cu otro profesionalnan cu lo duna cuida. Awor cu tin hopi critica riba maneho riba tereno social, tambe pobresa, cu ta afecta salud mental di nos muchanan y tambe inseguridad pa muchanan cu tin cu keda na so of serca un familiar no confiabel dor cu mayor(nan) tin cu traha, Evelyn Wever Croes ta core lansa un luna di concientisacion. Wyatt-Ras no ta critica e profesionalnan riba e tereno, sino gobierno cu no ta haci su trabou. Ta obvio cu sector social no ta riba lista di prioridad di e minister encarga cu Asuntonan Social, kende ta procedente di Cuerpo Policial. Den presupuesto di 2024 minister aki a dirigi su mes mas tanto riba e area di

Justicia y a laga e area social manera un huerfano un banda. E ta prefera di cumpra auto enbes di paga pa edificio di Centro pa Hoben y pa atende cu esnan cu tin salud mental. E argumentonan pa introduci un Crisisplan tabata un farce y basa riba mentira. Awor Evelyn ta admiti y ta bisa cu “tin diferente estudio y analisis haci, loke bo no ta weita ta cu cifranan ta bahando”, “pero esey nos tabata sa tambe na principio,” segun minister Wever-Croes. Kiermeen aki e ta admiti cu e tabata sa cu su argumento no ta corecto. Con e sra. aki por bisa cu a mitiga casonan si ainda sector social no tin un sistema uniforme di registra casonan. Paso tin un sistema di monitoria cu a ser anuncia cu fanfaria na Directie Volksgezondheid, sin embargo te ainda e otro departamentonan no tin un sistema uniforme di registracion. Hasta e centraal meldpunt cu ta Sostemi despues di di Crisisplan no tin un sistema uniforme pa registra, mientras esey ta e meta principal di Sostenemi. No a traha tampoco na cooperacion efectivo entre diferente instancianan. A usa 38 miyon pa djies pone un make up of show pa sector social kere cu ta haya atencion, lagando cooperacion y registracion sin atende. E victima di abuso di menor merece mihor. Awor e minister presidente cu no ta encarga ni cu e area social ni cu husticia ta core bin padilanti pa tapa tur critica. E ta bai concientisa nos pueblo contra abuso di menor. Esaki mientras cu den otro asuntonan e ta contesta cu e no ta mete den cartera di otro minister. Aki por mira claramente cu e sra. aki a inicia su campanja politico. En

bes di nombra terapeuta pa sector social y mas trahado social pa atende cu e tantismo casonan cu dia pa dia ta crece, e ta pensa riba show. Tampoco e no a baha wachtljsten y mehora registracion pa duna bista transparente di cantidad di casonan. A bira tempo pa bin cambio y mehoracion. Hunto cu mas cooperacion y registracion ta necesario un ley di jeugdhulpverlening pa asina regla den ley con ta proteha nos muchanan pa medio di diferente ministerio, instancia y profesionalnan y cu e ley aki lo mester stipula en general kico ta regarda e diferente procesonan, di accesibilidad, estructura, registracion y cooperacion entre instancianan pa garantiza derecho di mucha y di esun abusa berdaderamente. Na Hulanda y otro paisnan p.e. e ministerio di Asunto Social ta mara na esun di Salubridad y kinderbescherming (Volksgezondheid en Welzijn) pa di e forma aki garantiza cooperacion entre diferente di e ministerionan den defensa di e mucha. Wyatt-Ras ta spera cu berdaderamente e gobierno aki stop di make up y cuminsa trata di berdad pa atende cu asuntonan di nos muchanan y di abuso di menor.



INTELIGENCIA DI UN MUCHA NO TA DEPENDE DI SU NOTANAN



Aunke cu nos sa cu e inteligencia di un mucha no ta depende di su notanan, manera con nos ta laga nos mes como mayor, impresionan cu e cualificacionnan!

Un excelente ta yena nos di orguyo, un onvoldoende of suspension, ta decepciona nos, manera cu e nota aki lo defini kende nos yiu ta y cualnan ta su capacidadnan. E cualificacionnan escolar ta un forma di midi un conocimiento. Sin embargo, no ta duna cuenta di e esfuerso y e dedicacion cu e mucha a inverti den e proceso di aprendisahe.

Tampoco ta demostra si efectivamente e mucha a siña algo di forma consistente. Un mucha cu un bon memoria, kisas ta obtene bon punto.

Un mucha cu un inteligencia distinto den e materia den cual e ta wordo evalua, por haya onvoldoende. Sin embargo, den e materia vincula cu su tipo di inteligencia, seguramente e lo ta exitoso.

Inteligencia di e mucha

Si. Segun e psicologo y investigador Howard Gardner, den cda persona tin ocho tipo di inteligencia of habilidadnan cognoscitivo. E teroia di inteligencianan multiple aki, ta reconoci den hopi ambito educativo.

Di acuerdo cu e planteamento di e profesor Mericano aki, no ta existi un unico inteligencia unico humano. Tin un diversidad di inteligencia, cu ta marca e potencialidad, fortaleza y debilidadnan cu cada individuo tin y cu lo marca su actuacion den distinto escenario.

E teoria di inteligencianan multiple aki,

ta permiti balora, compronde y stimula e potencialidadnan di cda mucha, mas leu di loke por midi un indice di conciente intelectual.

Bo yiu tin tur e tipo di inteligencianan aki, solamente cu uno ta mas preponderante cu otro.

E inteligencia di e mucha pa matematica, por yud'e tin bon resultado. Sin embargo, no lo ta igual si e inteligencia pa linguistica of pa deporte ta mas debil. Tur esaki ta pone den evidencia e berdada cu e notanan no ta representa e inteligencia di e mucha.

E tiponan di inteligencia

Inteligencia linguistico

E muchanan cu e tipo di inteligencia aki ta siña skirbi, lesa, conta cuenta of haci crucigrama cu suma facilidad. Su lenguahe orral ta asina bon como esun skirbi. E tin facilidad pa siña idioma.

Inteligencia logico-matematica

Muchanan cu ta resolve cu facilidad problemanan aritmetico, problemanan di logica-matematica, weganan di strategia y experimento. Na esunnan cu e tipo di inteligencia aki ta resulta nan hopi facil resolve pruebanan di conciente intelectual.

Inteligencia visual y espacial

Muchanan cu gusta dedica nan tempo liber pa pinta, gusta resolve puzzel of ta prefera weganan di construccion, tin e tipo di inteligencia aki. Nan ta pensa den imagen y dibuho.

Inteligencia musical

Ta muchanan cu ta disfruta, siña y aprecia e cancionnan y musica. Nan ta identifica cu facilidad sonidonan. Nan tin e facilidad pa siña toca un instrumento musical.

PLAY-OFF SEMI FINAL 35 PLUS DI FEDEVETA

Diasabra pas ana stadion di Riverplate a tuma lugar e 2 semi-finalnan di Fedeveta 2023 den e categoria 35 Plus



Por bis cu e teamnan a bin pa gana y por lo tanto emoshonan y e caliber di weganan tawata sumamente halto, den e prome encuentro Bubali 35 + y Britannia 35+ a bataya otro pero na pito final Bubali a gana 3 pa 1. Mester bisa despues di wega tawatin un desacuerdo chikito y por lo tanto 1 caarcho corra a calma tur cos pabien na Bubali cu a pasa pa final

E di 2 partido a entre Riverplate cu nacional a bai manera tur expectativa, hopi duro y e referee a demonstra hopi pashenshi pa cu e batayan riba

tereno, e nivel di futbol si tawata hopi halto mes cu atakenan fuerste di ambos team cu a tene e 2 keeper hopi ocupa, pero na pito final Riverplate a logra pasa pa final cu e score di 2 pa 1. Un danki na e cuerpo di referee: Ben Lucker, Gustavo, Luis Zambrano, Rambo Flanegin, Y head of Referee

Ernst Mohamed, Diasabra awor 13 di April na nacional tin 2 bataya garndi y duro di 50 plus: 7 or ta Roma contra Caravel y 8:30 Hooiberg contra di e Sranaman di ARU-SUR.

Lo tin bar y cushina y musica di DJ Nacional




E BON NOTICIA

BIJBEL TA BISA, HESUS A LANTA
UN SOLO IGLESIA PA SALBACION DI
HUMANIDAD

Den Bijbel Exodo 24: 7 – 8, Testamento Bieuw nos por lesa, cu Dios Tata a sera e prome Aliansa cu e pueblo di Israel, pa medio di Moises. Den Bijbel 2 Samuel 7: 16, nos por lesa, cu Dios Tata e eligi David, e prome Rey di Israel. Dios Tata a priminti cu su yiunan, su sucesor nan, nan lo ta pa semper encabesa e Reino di Dios. Pero awor e promesa aki a wordo verifica den Cristo Hesus, den e Aliansa Nobo di Dios Tata. E Aliansa Nobo, Bijbel Mateo 26: 26-28: “Mientras nan tabata come, Hesus a tuma e pan, E’l a gradici Dios, a kibra e pan y a duna Su discipelnan. Tuma come, esaki ta Mi Curpa. Despues E’l a tuma e copa di binja, a yama Dios danki pa e copa y a pas’e pa nan, bisando: Boso tur bebe for di dje. Esaki ta Mi Sanger, e Sanger cu ta confirma e Aliansa cu Mi ta derama pa hopi hende, pa pordon di pikanan.” E sacrificio y morto di Cristo-Hesus na crus, Dios Tata a sera e Aliansa Nobo cu e pueblo di Israel, manera den Bijbel Lucas 1: 32 – 33 ta bisa: “Senjor Dios lo dun’E e Trono di Su antepasado David, te den eternidad lo E ta Rey di e decedientenan di Jacob y Su Reino lo no tin fin.” E Aliansa Nobo aki, ta Cristo-Hesus Su unico Iglesia Universal pa medio di Su Apostelnan. Den e prome Aliansa, e hudiunan tabata encabesa e Reino di Dios Tata y Moises tabata e Vicario di Dios Tata. Pero awor Cristo-Hesus escohe Pedro y a entregel’e e yabinan di Reino di Cielo. Den Bijbel Mateo 16: 15 – 19: “E ora ey Hesus a puntranan: Anto boso mes, ken boso


mes ta bisa Mi ta? Simon a contesta: Bo ta E Mesias, e Yiu di Dios bibo! Hesus a bis’e: Felis bo ta Simon yiu di Huan, pasobra no ta hende a revela bo esaki, ma Mi Tata cu ta den Cielo. Mi ta bisa bo: Abo ta Pedro, (o sea baranca) y riba es baranca aki lo Mi lanta Mi Iglesia y forsanan di fierno lo no podera di dje. Lo Mi duna bo e yabinan di Reino di Cielo y loke bo prohibi na tera, lo ta prohibi den Cielo tambe, loke bo permiti na tera, lo ta permiti den Cielo tambe.” Aki Cristo-Hesus ta bisa bon cla, Mi Iglesia, o sea un solo Iglesia Universal y no iglesianan. E demonionan di fierno, no por kibra y ni vence e Unico Iglesia aki di Cristo-Hesus, pasobra den Bijbel Mateo 28: 20: “Lo Mi ta cu bosonan tur dia, te na cabamento di mundo.” Cristo-Hesus a entrega Pedro e yabinan di Reino di Cielo y esaki ta significa cu pa medio di e Unico Iglesia Universal Catolico cu Cristo a lanta, e almanan por drenta den e Reino di Cielo. E yabinan di Reino, ta e 12 portanan di e Reino di Cielo y riba cada porta tin e nombernan di e 12 Apostelnan Obispo scirbi. Iglesia Universal Catolico ta e unico porta pa drenta Reino. Riba e stoel di San Pedro (e prome Papa, e prome Vicario) ta encontra, ken mester di salvaguardia y proteha e fe Cristian. Cristo-Hesus a duna San Pedro (prome Papa) e autoridad di loke ta prohibi y di loke ta permiti den e Iglesia Universal Catolico. Cristo-Hesus a establece den Su Unico Iglesia Catolico, e 7 Sacramentonan di Dios Spirito Santo pa salvacion, segun

Bijbel. Sacramento di Bautismo, Mateo 28: 19-20. Sacramento di Confirmacion, Echonan di Apostelnan 2: 1-4. Sacramento di Confesion, Huan 20: 23. Sacramento di Eucaristia, Lucas 22: 19-20. Sacramento di Matrimonio, Mateo 19: 4-6. Sacramento di Orden Sacerdotal, Marco 3: 13-15. Sacramento di Enfermonan, Hacobo 5: 14-15. E Iglesia Universal Catolico, tin mas di 2000 anja di existencia y tabata tin 265 Papanan, desde San Pedro te na e Papa actual. Sinembargo na anja 1521, Martin Luther, un ex-sacerdote catolico excomulga, a inventa e teoria di e interpretacion liber di Bijbel. E interpretacion liber aki, a produci 36.000 diferente sectanan y oposicionnan. Tur e sectanan aki, ta pretende di ta di Cristo-Hesus. Durante tempo hopi di nan a lanta nan mesun iglesia y predicando e Bijbel na nan manera y buscando discipelnan debil den fe. Carta di San Pablo na su coleganan Obispo, Bijbel Echonan di Apostelnan 20: 28-30 : “Cuida boso y di henter e rebanjo na cual Spirito Santo a pone boso como Obisponan pa warda e Iglesia di Senjor, na cual E’l a gana cu Su propio Sanger. Mi sabi cu despues di Mi partida, lo drenta lobonan feroz cu lo no tene compasion cu e rebanjonan y cu denter di boso mes lo surgi hendenan cu lo sinja doctrinan an robes y nan lo gana discipelnan nan tras.” Hesus ta duna instruccion na Su Apostelnan (Obisponan), Bijbel Marco 16: 15 -16 : “Hesus ta bisanan: Sali pasa na henter mundo y predica e Evangelio pa



henter humanidad. Esun cu kere y ta bautisa, lo ta salba, ma esun cu no ta kere, lo ta condena.” E Iglesia Catolica, ta e pueblo nobo di Israel di Dios Tata den e Aliansa Nobo di Cristo-Hesus. E hudiunan, nan mes mester kere den Cristo-Hesus y nan mester bautisa den e

Iglesia Catolica pa nan por ta salba. Pasobra e prome Aliansa di antes di Moises no tey mas, ta e Aliansa Nobo di Cristo-Hesus tey, pa salvacion di henter humanidad. Seferino Tromp Koyari 13-D tel. 5931157 / 5870048 ID. 57.11.22.40



8								
		3	6					
	7			9		2		
	5				7			
				4	5	7		
			1				3	
		1					6	8
		8	5				1	
	9					4		

		8		3		5	4	
3			4		7	9		
4	1				8			2
	4	3	5		2		6	
5								8
	6		3		9	4	1	
1			8				2	7
		5	6		3			4
	2	9		7		8		

MUHE A PERMITI SU RUMAN HOMBER KEDA DEN E CAS Y HASTA DAL SU DROGA PERO ULTIMO DIANAN ELA BIRA PELIGROSO TE SACA CUCHIU P'E!



Diahuebs mainta a drenta informe di un caso di menasa cu arma na Cantaloupestraat, mesora a

dirigi patruyanan na e sitio.

Na yegada di e patruya a

bin compronde cu eynan tin 2 ruman ta biba y e muhe ta hasta permiti e ruman usa su droga pero

ultimamente ela bira hopi agresivo y e mainta aki ela saca un cuchiu y a menas'e cu esaki y esey si

e ruman muhe no ta tolera di dje y a yama polis y ta entrega keho di menasa.


Polis a confisca un auto casi nobo relaciona cu un investigacion




















Ultimamente polis ta trahando riba un caso unda a rekeri confisca un auto. Nos a busca tur manera pa

haya sa ki caso pero no a logra haya contacto cu e voceronan policial encuanto e confiscamento di e

auto aki. Pero esaki nos ta sospecha cu lo ta un caso cu proximamente lo bay sali na cla.



Paardenbaaistraat 10, Oranjestad, Aruba Tel.: (297) 525 - 7555
www.lottoaruba.com
Resultado : Sorteo 12 April 2024 Merdia

 <p>Sorteo # 4236</p> <p>8881</p> <p>4564</p> <p>2213</p> <p>MULTI X</p> <p>FP</p> <p>BIG 4</p> <p>Sorteo # 4236</p> <p>2025</p> <p>MULTI X</p> <p>X5</p> <p>10FF</p> <p>Sorteo # 2292</p> <p>0162</p> <p>ZODIAC</p> <p>Sorteo # 4236</p> <p>8659</p> <p>Cancer</p> <p>LUCKY 3</p> <p>Sorteo # 1106</p> <p>589</p> <p>MULTI X</p> <p>X2</p>	<table><tr><td></td><td></td></tr><tr><td>Sorteo #</td><td>Joker Letter</td></tr><tr><td>0 x Jackpot</td><td>Proximo Jackpot</td></tr><tr><td>0 x Match 4+</td><td>200.000,-</td></tr><tr><td>0 x Match 4</td><td></td></tr><tr><td>0 x Afl. 12,00</td><td></td></tr></table> <table><tr><td></td><td></td></tr><tr><td>Sorteo #</td><td>Proximo Jackpot</td></tr><tr><td>0 x Jackpot</td><td>54.000,-</td></tr><tr><td>0 x Match 4</td><td></td></tr><tr><td>0 x Afl. 8,00</td><td></td></tr></table> <table><tr><td></td><td></td></tr><tr><td>Sorteo #</td><td>Mega Ball</td></tr><tr><td>0 x Jackpot</td><td>Proximo Jackpot</td></tr><tr><td>0 x match 4</td><td>350.000,-</td></tr><tr><td>0 x Afl. 500,00</td><td></td></tr><tr><td>0 x Afl. 50,00</td><td></td></tr><tr><td>0 x Afl. 15,00</td><td></td></tr></table> <table><tr><td></td><td>Afl. 450.000,-</td></tr></table> <table><tr><td></td><td></td></tr><tr><td>Sorteo #</td><td></td></tr><tr><td></td><td></td></tr><tr><td></td><td></td></tr><tr><td></td><td></td></tr></table>			Sorteo #	Joker Letter	0 x Jackpot	Proximo Jackpot	0 x Match 4+	200.000,-	0 x Match 4		0 x Afl. 12,00				Sorteo #	Proximo Jackpot	0 x Jackpot	54.000,-	0 x Match 4		0 x Afl. 8,00				Sorteo #	Mega Ball	0 x Jackpot	Proximo Jackpot	0 x match 4	350.000,-	0 x Afl. 500,00		0 x Afl. 50,00		0 x Afl. 15,00			Afl. 450.000,-			Sorteo #								
																																																		
Sorteo #	Joker Letter																																																	
0 x Jackpot	Proximo Jackpot																																																	
0 x Match 4+	200.000,-																																																	
0 x Match 4																																																		
0 x Afl. 12,00																																																		
																																																		
Sorteo #	Proximo Jackpot																																																	
0 x Jackpot	54.000,-																																																	
0 x Match 4																																																		
0 x Afl. 8,00																																																		
																																																		
Sorteo #	Mega Ball																																																	
0 x Jackpot	Proximo Jackpot																																																	
0 x match 4	350.000,-																																																	
0 x Afl. 500,00																																																		
0 x Afl. 50,00																																																		
0 x Afl. 15,00																																																		
	Afl. 450.000,-																																																	
																																																		
Sorteo #																																																		

FORTALEZA PA FAMIA

Scirbi pa Pastor Marcel Balootje.

CONOCE CRISTO HESUS Y BO NO KIER PORDONA, TA DURESA DI CURASON

Con lo para cu un hende cu muri cu e pica di falta di pordon riba su curason?

Falta di pordon ta reina den hopi curason, odio rabia, engaño y cosnan di pasado cu hende no kier laga los, hendenan cu kier pone condicion pa Dios, con nan lo pordona por ehempel:

Mi ta pordona , pero mi no ta lubida,

Mi ta pordona pero mi no kier e persona.

Mi ta pordona pero dia mi

muri , mi no kier tal hende na mi entiero.

Ami no ta pordona, bay pidi Dios pordon.

Si ta riba mi e ta warda pa pordon e tin hopi di warda.

Mi ta pordona pero lage e persona ey keda leu for di banda di mi.

Pero Dios a establece Su condicion pa pordona cual ta para scirbi den:
Mateo 6:14-15 .
Mateo 18:33-35.
Marco 11:25-26.

Mateo 18:21-22.
Lucas 17:3-4.

E evangelio di Dios, cu nos Señor Cristo Hesus a presenta na nos ta un evangelio di pordon, pasobra sin arrepentimiento y pordon no tin salvacion, salvacion a alcansa nos bida ora nos picanan a wordo pordona.

Falta di pordon ta stroba nos relacion cu Dios.

Si nos conoce e evangelio y ainda nos ta lucha pa pordona hende, e evangelio ta envano, pasobra con nos ta haci drenta cielo cu un curason yen di falta di pordon, aceptando pordon, pero no den condicion pa pordona.(Efesionan 4:31-32).

Falta di pordon ta un mascarada dificil pa kita, cu ta haci manera e no tey, e ta smile, haci contento, pero den e curason tin amargura scondi manera den un kelder den santana.

No lubida cu Dios conoce cada intento di nos pensamiento y tambe nos curason.

Ta hopi aviso Dios a duna nos den su palabra, pa nos pordona y haci nos curason limpi, pero hopi hende kier hacie e asunto manera nan kier,

No scirbi riba whatsapp pa un persona cu bo ta pordona, pero bo curason ta leu for di e asunto.

No manda un voice message , bisando cu bo ta pordona, pasobra bo kier evita di topa cu e persona personalmente, y asina bo ta gaña bo mes.

Si abo dicidi den bo curason pa pordona un persona, no

worry cu e no pordona bo, pasobra ora bo ta pordona ta pa bo keda liber di pica, pasobra falta di pordon ta pica.

Y cada pica scondi den nos bida, ta stroba nos relacion cu Dios y ta tranca nos crecimiento spiritual.

Ta tempo pa bira serio, y tuma Dios na serio, pasobra profecia, prosperidad, uncion, proceso, hende yen di spirito santo, tur esey nan ta tranca ora falta di pordon ta presente den nos bida.

Prome cu Hesus a subi na cielo E a drecha e relacion cu Pedro, puntrando Pedro bo stima Mi, pasobra Hesus ta stima Pedro, y prome cu e subi na cielo e a demostra esey door di encarga Pedro cu ministerio.(Juan 21 :15-22).

Falta di pordon ta causante di hopi problema, hopi divorcio, hopi division den familia, hopi rabia, hopi odio y hasta vengansa cu morto.


E yega tempo pa tur hende realisa cu e Evangelio di Cristo Hesus ta cuminsa cu amor (Juan 3:16-21) y ta culmina cu pordon bisando: Tata pordona nan, pasobra nan no sa kico nan ta haci.(Lucas 23:34).

Hebreonan 12:14 ta para scirbi: Aspira pa tin pas cu tur hende, y santificacion, sin cual ningun hende lo mira Señor.

Falta di pordon y rabia ta carnal, y esnan cu ta practica cosnan asina lo no hereda reino di Dios.(Galatianan 5:19-21)

Dios tene misericordia.

ORACION DI DIA



Un dia fructifero colma cu e bendicion y forza di ariba y yena cu Spirito Santo

"Pasobra esun cu Dios a manda ta papia palabra di Dios; pasobra Dios ta dun'E Spirito Santo na abundancia." Huan 3, 34

Dios a manda Hesus pa siña cada un di nos con nos mester biba. Cu nos mester kere y obedece Dios. Kere den Esun cu Dios a manda, acept'E y respet'E. Ta berdad cu nos ta biba riba e mundo aki pero nos no ta pertenece na e mundo aki. Nada di e mundo aki por duna nos e felicidad berdadero. Solo Dios por haci e hende feliz. P'esey laga nos haci nos maximo esfuerso pa agrada Dios y biba di acuerdo cu Su santo voluntad.

Ban pidi Dios pa prepara nos pa ricibi Esun cu E lo manda for di shelo pa nos mescos cu E la baha riba Hesus riba dia di Su bautismo cu ta e Spirito Santo di Dios. E ta Esun cu ta yuda nos y siña nos loke ta e berdad pa nos keda pertenece na Su reino y nos por ta e testimonio cu ta confirma cu Dios semper ta e berdad. Door di esey nos ta haya un bida nobo hunto cu Hesus cu a resucita canando riba e caminda di bida eterno. E unico caminda, berdad y bida cu ta hiba nos na salvacion.

Oracion: Tata Celestial duna nos e gracia pa acepta, kere y respeta Bo Palabra. Laga Bo Spirito Santo por baha riba nos y duna nos e uncion cu semper Bo tin warda pa nos. Amen.



PRONOSTICO DI TEMPO

VALIDO TE DIABIERNA 12 DI APRIL 2024, 18:00 ORA

TEMPO:
AWE TARDI Y AWE NOCHI: PARCIALMENTE NUBLA
Y GENERALMENTE SECO
DEN MARDUGA Y MAYAN: PARCIAMENTE NUBLA CU UN AWACERO PASAJERO

TEMPERATURA MAXIMO 33 GRADO CELSIUS
TEMPERATURA MINIMO 27 GRADO CELSIUS
INDICE DI CALOR (HEAT INDEX) DEN Y ROND
DI ORANAN DI MERDIA: 34 PA 39 GRADO CELSIUS
UV INDEX: 12

AVISO/ ALERTA:
TA SUGERI OCUPANTENAN DI BOTO CHIKI-TO PA BAI
CU CAUTELA NA PARTINAN OOST TE NOORDWEST DI COSTA.

PRONOSTICO DI TEMPO PA PROXIMO 3 DIANAN:
PARCIALMENTE NUBLA SIN AWACERO DI IMPORTANCIA.
BIENTO LO TA MODERA TE BASTA FUERTE FOR DI DIRECCION OOST; FUERTE TE DURO DEN RAFAGA.
TEMPERATURA (GRADO CELSIUS) MAX / MIN LO TA: 33 / 27